

S A C R A
N A T A L I T I A
SEREN. DUCIS SAXON. GOTH. ALTENB.
F R I D E R I C I I V

I N
ILL. GYMNASIO FRIDERICIANO ALTENB.
A. D. IV. CAL. DECEMBR. POST HORAM X ET DIM. MATUT.

PIE CELEBRANDA

I N D I C I T

AUGUSTUS MATTHIAE

D. PHIL. SEREN. DUCI GOTH. A CONSILIIS ECCLES. ET SCHOL.
DIRECTOR GYMNASII,

De usu Futuri exacti Latinorum.

A L T E N B U R G I.
E T Y P O G R A P H E O A U L I C O.



*QUOD FELIX FAUSTUM FORTUNATUM-
QUE SIT,*

Indicimus natalem Principis Serenissimi atque Indulgentissimi crastino die in Gymnasio nostro pie concelebrandum, quo die ut frequentes adeste velitis, Amplissimi Reipublicae urbisque Procures, Gymnasii Curatores atque Inspectores Gravissimi, et reliqui litterarum cultores ac fautores, utque orationes adolescentium, quibus hunc diem celebrare conabuntur, ea, qua soletis, facilitate audiatis, vehementer oramus atque obsecramus. Ad verba autem facienda prodibunt quatuor Selectae classis cives:

Carolus Fridericus Hacufsner, Grolsensteina-Altenburgensis, de vestigiis providentiae divinae in historia populorum exstantibus dicet *oratione Latina*;

Aemilius Lange, Saara-Altenburgensis, Confucii dictum de triplici temporis ratione explicabit *oratione Germanica*;

Eduard Koehler, Altenburgensis, Caroli XII, Sueonum regis, res gestas declarabit *carmine heroico Latino*;

H. Conon de Gabelentz, Altenburgensis, Ariadnes, in Naxo insula reliotae, quercus exprimet *carmine Germanico*.

In quaestionibus grammaticis illud nunc praecipue requiritur, ut, quae causa sit cuiusque verborum vel sententiarum conformationis, (constructionem s. structuram vocant) diserte et plane explanetur; et recte quidem: nam nisi causam teneas, cur quidque eo, quo solet, modo dicatur, nec vim cuiusque constructionis teneas, nec cui quaeque loco accommodata sit, diiudices. Sed in hoc genere illud imprimis cavendum est, ne causas comminiscamur eas quae ex recondita aliqua ratione philosophica petitaе sint, et per se probabiliter cogitari possint, ad usum autem optimorum scriptorum haud commode adhiberi queant; nisi enim causae illae ex ipsis scriptorum locis diligenter collectis et accurate inter se collatis ac ponderatis eliciantur, vana est atque inutilis omnis illa causarum indagatio, et magis, quid dici potuerit, quam quid revera dictum fuerit, demonstrat. Saepe etiam causae illae non in certa aliqua ratione, sed in similitudine aliqua positaе sunt, ut refertus rei nonnunquam dixerunt Romani nullam aliam ob causam, nisi quod adiectivum plenus ita usurpabant. Grammaticae autem Latinae, ut partes nonnullae egregie explicatae sunt, ita aliae, et fortasse plures numero, nondum satis expolitaе, quod e Grammaticorum dissensionibus apparet; corpus autem grammaticae, ex quo accurate cognoscas, quaenam in Latio ipso nata, quae transmarina sint, quid diversorum scriptorum, nec tantum poetarum et eorum, qui prosa oratione uti sunt, sed horum etiam inter se comparatorum, ut Ciceronis et Livii, distet, vix inchoatum videtur. Sed, ne vagetur oratio, tractandum sumsi locum de futuro exacto, de quo Viros doctissimos inter se dissentire, nonnullos diversa etiam inter se commiscantes, videbam, non quo meam unam rectam esse eius explicandi viam censerem, sed quod non melius profici in quaque doctrina existimo, quam si qui in eodem genere elaborant, sententiam suam libere profitentur. Nihil autem minus decet Grammaticum, quam sua tantum mirari, quae alii afferant, cum supercilio fastidire.

Iam primum hoc norunt omnes, futurum exactum poni, ubi duae actiones comparentur, quarum altera alteram praecesserit. Itaque multi in eo saepe haeserunt, quod non raro futurum exactum positum reperitur, ubi non actio alteram futuram praegressa, sed eam continuato tractu prosequens, commemoratur, ut si potuero. Brut. 5, 21. ego vero, si potuero, faciam vobis satis. Tusc. Disp. I, 43, 103. verumtamen, Crito, si me assequi potueris — — ut tibi videbitur, sepelito. Leg. II, 18 in. Plato si modo interpretari potuero, his fere verbis utitur. Et Ernestus quidem plerumque si potero scribendum edixit, contra quem pugnat Heusing. Praef. ad Cic. off. p. LI. ubi quid intersit inter si potero et si potuero docere conatur. Aliam viam ingressus est Goerenz. ad Fin. IV, 6, 14. quam mox explorabimus. Sed mutari illa loca vetant non tam libri manu scripti, qui in illa lectione consentiunt — facile enim librarii a potero ad potuero aberrare potuerunt — quam aliae confimiles locutiones, si voluero Off. III, 19, 76. Leg. III, 13 in. Caes. B. C. II, 24 extr. si licuerit epp. fam. V, 4, 4. IX, 16, Phil. II, 21, 51. si placuerit Or. II, 48, 198. si quid fuerit loci Leg. III, 13, 29. epp. fam. X, 28, 9. Plura scribam, si plus otii habuero. Haec enim, posse, velle, licet, placet, locus est, omnia actionem iuxta alteram continuatam suapte natura indicant, neque tamen, qui volet, licebit, placebit corrigere velit, audaciae crimen effugiat. Accedit, quod, ubi oratione obliqua utuntur, plusquamperfecto utuntur, quod futuro exacto in illa orationis forma respondere constat. Cic. de orat. II, 2, 7. Quo etiam feci libentius, ut ea custodirem litteris, si ullo modo assequi complectique potuiffem. Cf. ib. 49, 200. III, 35, 140. Caes. B. C. I, 68 extr. ib. 19. proinde, si qua facultas fuisset, ad se cum omnibus copiis veniret. Mihi in his Romani id spectasse videntur, quod, etiam si actiones, quae verbis posse, velle etc. declarantur, continuari

necesse sit, dum actio ab iis profecta perficitur, tamen potestas, voluntas etc. praecedere etiam debent ipsam rem, nec quisquam unquam rem aggreditur, nisi potestas ac voluntas eam et suscipiendi et perficiendi antea assuerit. Ita, si sententiam spectes, nihil omnino interest inter si potuero, si voluero. et si potero, si volam, sed utram locutionem eligere velit scriptor, in ipsius arbitrio positum est, et omnibus illis locis nihil causae est, quare non etiam, si potero, si volam, si licebit, si placebit, si quid erit loci, si possem, si qua facultas esset, scribatur. Hinc alterum futurum cum altero non nunquam commutatur, ut epp. fam. IX, 16, 2. quidquid arte fieri poterit (non enim iam satis est consilio pugnare: artificium quoddam excogitandum est) sed tamen quidquid elaborari aut effici potuerit etc.

Praeterea saepe etiam duo futura exacta ita ponuntur, ut alterum ad alterum referatur, ut Or. III, 14, 55 quarum virtutum expertibus si dicendi copiam tradiderimus, non eos quidem oratores effecerimus; sed furentibus quaedam arma dederimus. Or. 69, 231. quae vitia qui fugerit, — — — is omnia fere vitia vitaverit. Partit. or. 3, 10. quare quum de causa dixero, de utroque dixero. pro Ligar. 12, 36. quam salutem quum utrisque his dederis, tres fratres optimos et integerrimos reipublicae condonaveris. Phil. I, extr. huc si quid accesserit, non tam mihi, quam vobis rei publicae accesserit. epp. fam. X, 13. extr. qui M. Antonium oppresserit, is bellum confecerit, quod iisdem paene verbis repetit ib. 19 extr. qui Antonium oppresserit, is hoc bellum teterrimum periculosissimumque confecerit, et XI, 12. is bellum confecerit, qui Antonium oppresserit. de Fin. III, 3, 10. quidquid enim praeter id, quod honestum sit, expetendum esse dixeris in bonisque numeraveris, et honestum ipsum, quasi virtutis lumen,

extinxis et virtutem penitus everteris. Cf. ib. V, 16, 45. epp. fam. II, 18, 6. XI, 27, 19. Eadem est ratio infinitivi perfecti ap. Cic. Verr. III, 95. in. Quapropter si vos semel in iudicando finem aequitatis et legis transieritis, scitote vos nullum ceteris in aestimando finem improbitatis et avaritiae reliquisse, i. e. si transieritis—reliqueritis. Nonnunquam pro altero futuro ponitur imperativus, ut orat. 70, 232. Immuta paulum; perierit tota res i. e. si immutaveris, perierit. Tusc. I, 13, 30. tolle hanc opinionem; luctum sustuleris; quo etiam pertinet illud Ovidii, Da mihi te facilem; dederis in carmina vires. nonnunquam etiam alia locutio, ut ap. Liv. 26, 43. in una urbe universam ceperitis Hispaniam, i. e. si hanc unam urbem ceperitis, univ. ceperitis Hisp. Quibus locis si quis futura exacta optandi vim habere cum Goerenzio (in prolus. edita Zwiccaviae s. a. quaestio de vi futuri exacti optativa. Cf. idem ad Ciceron. de fin. I, 20, 70. IV, 6, 14.) statuatur, is primum caveat, ne optativos Graecis inauditos proferat, *ληψοίμην, δέξαιμι, ἐκφύζοιμι, παρέξαιμι* (p. 5.) tum doceat, quis optativo locus sit in his Phil. XII, 12, 30. Haec quoque pericula tanta si effugero, satisne tutum reditum putatis fore? Quum enim et vestra auctoritate et meo me more defendero, et meam fidem reipublicae constantiamque praestitero, tum erunt etc. quae vix quisquam Graece mediocriter doctus sic cum Goerenzio vertat: *εἰ ἐκφύγοιμι, εἰ διασωθείην, εἰ παράσχοιμι*; sed ἢ *ἐκφύγω, ἢ ἀπολογήσωμαι, ἢ παράσχω*, in quibus aoristus vim futuri exacti exprimit, vel *εἰ ἐκφύζομαι, εἰ παρέξω*, ut Ennii illa si te secundo lumine hic offendero, Moriere ex his Euripidis versa sunt Med. 356. *εἰ σ' ἢ πῶσα λαμπρὰ ὄψεται θεῶν - - Θανεῖ*. Nec minus idem errat, quum p. 13. haec Romam quum venero, quae perspexero, scribam ad te, Ut sementem feceris, ita motus, Morati melius erimus, quum didicerimus, quid natura deside-

ret si graece verteris, ex huius linguae indole itidem optativo efferenda esse dicit. Denique, quum ad plures animi affectiones significandas optativus valeat, declarandum etiam erat, quam ille in istis locutionibus vim haberet. Si quis enim modestiae alicuius significationem in Livii formula XXVI, 43. inesse statuatur, videatur ne nimis modestum et minime imperatorium sibi fingat imperatorem, qui, quum milites ad aggrediendam urbem excitare velit, dubitare se profiteatur, an capturi sint urbem. Nec qui vere modestus est, dicere solet scitote vos reliquisse, Cic. Verr. III, 95. sed videte vel vereor, ne relinquatis. At Graecis ipsis, ut ait idem ib. Optativus saepe sic ponitur, ut eius rationem iudicio non nisi acriore adhibito rite assequi possis. Sed taedet in his refutandis diutius immorari. Unus mihi vim fut. exacti recte perspexisse videtur Grammaticus, non ille quidem e doctissimis, sed qui multa tamen et accurata lectione sensum latinitatis satis subactum haberet, Broeder. Gramm. lat. §. 618. dicens, tum futurum ex. in utroque orationis membro poni, quum dicere velis, actionem aliquam eodem temporis puncto absolutum iri, quum altera absoluta fuerit. Eodem modo hunc usum explicat Krebsius in libro utilissimo Anleitung zum Lateinisch-schreiben §. 272. Hoc quidem in omnibus locis, quae vel ipse attuli, vel ab aliis allata vidi, fieri intelligo, ut futura exacta actiones significant, non per aliquod temporis spatium uno tenore sese subsequentes, sed eodem temporis articulo perfectas. Nam et qui virtutis experti copiam dicendi tradit, eo ipso, quod tradit, non post aliquod demum tempus; neque sic ut per aliquod tempus utraque actio continuetur, furenti quaedam arma tradit, et Caesar si salutem dat petentibus, eodem tempore et actione eadem tres fratres reipublicae condonat, et bellum confectum erit oppresso Antonio. Magis etiam eiusdem actionis τὸ ἐμόχρον seu temporis congruentia, ut ita dicam, elucet e locis iis, ubi idem verbum bis ponitur, dixero-dixero; accesser-

rit-accofferit. Ut enim duae res praeteritae triplici ratione inter se comparantur, vel ita ut altera demum finita altera sequatur, in quo genere actio finita plusquamperfecto, sequens perfecto declaratur, vel ita ut duae actiones tempore inter se coniunctae sint, et vel per aliquod tempus simul continuentur, ubi duo Imperfecta ponuntur, vel in unum idemque temporis momentum concludantur, quod significatur perfecto bis posito *), sic duae res futurae vel ita inter se referuntur, ut alteram finitam altera post aliquod tempus vel statim subsequatur, quod quum fit, futuro exacto respondet simplex, vel ita ut duae actiones altera alteram quasi pari passu comitentur, quae vis est duplicis futuri simplicis, vel ut uno eodemque tempore plene contineantur, et utraque absoluta cogitetur, ad quam rationem declarandam duplici futuro exacto utuntur. Sic quod [supra o Cic. epp. ad Att. 7, 3, 11. attuli, si Cicero ipse Catoni scripssisset hortandi fortasse causa, haud dubie dixisset Bibulum quum ornaveris declaraveris. Hinc etiam, quum de re futura loquentes praeter ea, quae in idem, quod prius verbum, tempus incidunt, actionem etiam sua natura continuatam commemorant, inter plura futura exacta futurum simplex interponunt, ut Cic. epp. famil. X, 14. Quod si erit factum (i. e. si curaveris, ut ne qua scintilla teterrimi belli relinquitur) et remp. diivino beneficio affeceris, et ipso aeternam gloriam consequere. Nam rempublicam beneficio afficiet Plancus eo ipso quod bellum penitus extinxerit, gloriam autem post illud demum, eamque non brevi praetereuntem, sed duraturam et indies sese corroboraturam consequetur. Contra in epistola ad Plancum annexa ep. ad At-

*) ut Cic. ad Attic. 7, 3, 11. quem quum ornavit Cato, declaravit iis se solis invidere etc. Nat. d. III, 28, 70. si mens voluntasque divina idcirco consuluit hominibus, quod iis largita est rationem, iis solis consuluit, quos bona ratione donavit. Cf. ib. 30, 74.

tic. XVI, 16, 5. Quod si feceris, me, quem voluntate et paterna necessitudine coniunctum semper habuisti, maximo beneficio devinctum habebis, ubi si verbo habere abstinere voluisset, haud dubie dixisset devinxeris, ut epp. fam. XIII, 29, 15. Hanc rem si effeceris. -- Capitonem ad tuam necessitudinem tuo summo beneficio adiunxeris. Cf. ib. XIII, 7, 10. Eadem ratio est loci Catil. IV, 6 in. Quamobrem si hoc statueritis, dederitis mihi ad concionem comitem populo earum atque iucundum, si Silani sententiam sequi malueritis, facile me atque vos a crudelitatis vituperatione defendetis: neque enim defensio illa, probata Silani sententia, eadem opera finita et perfecta erit, sed saepius etiam ea utendum erit. Nonnunquam prior actio est continua, altera statim cum priore eventum habitura, ut Tusc. II, 26, 63. tibi si recta probanti placebis, tum non modo tete viceris, sed omnes et omnia. Caesar ap. Cic. epp. ad Att. X, 8, (34.) Namque et amicitiae graviores iniuriam feceris, et tibi minus commode consulueris, si non fortunae obsecutus videbere. ubi dicere etiam poterat facies — consules, sed sensu paulum diverso: hoc enim significaret, eum per totum hoc tempus, quo fortunae obsecutus videretur, iniuriam factorum esse et sibi minus consulturum; feceris — consulueris quum dicit, indicat eum tum statim, quum visus fuerit, iniuriam factorum esse.

Similiter pro altero fut. exacto nonnunquam ponitur perfectum. Cic. Verr. III, 62, 145. nisi ita manifesta res erit allata, ut responderi nihil possit, vicimus. Liv. 21, 43. si tales animos in proelio habebitis, quales hic ostenditis, vicimus., vel post imperativum pro fut. exacto, ut Verr. II, 23, 61. Unum ostende (i. e. si ostenderis) in tabulis aut tuis aut patris tui; vicisti. Sic Eurip. Med. 78. *ἡ πωλόμεσθ' ἄρ', εἰ κακὸν προ-*

σοίσομεν νέον παλαιῷ. Hoc gravius etiam affirmat, quam si futura exacto posita essent, vicerimus, viceris, siquidem ne futuri quidem significatio adest, sed una rei praeteritae.

Supereſt formula, quae difficillimam explicationem habet, videro, videris etc. quod si tantum de reliquis, praeter primam, personis usurparetur, quis non pro perfecto coniunctivi haberet, etsi neminem fore puto, qui Ciceronem in his Platonis ὀρασοίμην cum Goerenzio prolit. p. 9, imitatum esse dicat: nam neque in Platone neque in ullo alio scriptore graeco ὀρασοίμην vel ὀρασοίμην legitur. Sed Cicero Acad. Qu. II, 24, 76. Quid inventum sit, paulo post videro. Ib. 44, 135. recte secusne alias viderimus. Leg. 1, 21. Cui tamen ego assentiar in omnibus nec ne, mox videro. Fin. I, 10, 35. Quae fuerit causa mox videro. Tusc. Disp. V, 7, 20. Sed videro, quid efficiat; tantisper hoc ipsum magni faciam quod pollicetur. Contra nonnunquam est futurum simplex, ut Fin. V, 21. extr. Quorum omnium quae sint notitiae, — — mox videbimus. Epp. fam. III, 9, 8. Verum haec videbimus. In his formulis futurum exactum pro simplici poni, vix adducor ut credam, nec ullum in his optativo locum esse video, ἴδοιμι ἄν, multo minus ὀφείλοιμι ἄν. Originem locutionis hanc esse suspicor: quum videre, ubi ad animum transfertur, proprie sit perpendere, considerare, Latini, si dicere volunt de hac re deliberabo, quaeram, et quae facienda vel dicenda sunt, curabo, dicunt hoc videbo. At videro proprie esse videtur, quum rem consideravero, decernam eam et diiudicabo, ubi omittitur id, quod consequens est videndi et considerandi actioni. Sed usus latinus manavit, et hanc formulam ad ea transtulit, quae seria consideratione et sententiae de re latae pronuntiatione vix digna viderentur. Hinc videro est seponentis aliquid, ut loquitur Cortius ad Cic. epp.

fam. IV, 12. tanquam quod vix operae pretium sit diligentius excutere, sed leviter et celeriter percurrere satis sit. Celeritatis quidem aliquam significationem inesse, Zumptius etiam Gramm. lat. §. 76, 11. Ann. p. 364 (ed. tert.) et Stallbaumius ad Ruddimanni Institut. gramm. lat. II, p. 383. viderunt. Sic Graeci futuro tertio utuntur. Aristoph. Plut. 1027. τί γάρ ποιήσει, φράζε, καὶ πεπράζεται. Plato Gorg. p. 469. D. ἰὰν γὰρ ἄρα ἐμοὶ δοῖη τινὰ τούτων τῶν ἀνθρώπων. ὧν σὺ ὄρας αὐτίκα μάλα δεῖν τεθνάναι, τεθνήξεται οὗτος ὃν ἂν δοῖη, καὶ τινὰ δοῖη μοι τῆς κεφαλῆς αὐτῷ κατακτείναι δεῖν, κατακτείνῃς ἔσται αὐτίκα μάλα etc.

